

ABRAHAM SACRIFIANT

Sara

C'est quelque entreprise secrette.

Abraham.

[400] Mais telle qu'elle est, Dieu l'a faicte.

Sara

Au moins si vous sauez où c'est.

Abraham.

Bien tost le sauray, si Dieu plaist.

Sara

Il n'ira iamais iusques là.

Abraham

Dieu pouruoirà à tout cela.

Sara

[405] Mais les chemins sont dangereux.

Abraham.

Qui meurt suyuant Dieu, est heureux.

Sara.

S'il meurt, nous voila demeurez.

Abraham

Les morts de Dieu sont asseurez.

Sara

Mieux vaut sacrifier icy.

Abraham.

[410] Mais Dieu ne le veut pas ainsi.

Sara

Or sus, puis que faire le faut,
Je prie au grand Seigneur d'enhaut,
Monseigneur, que sa saincte grace
Tousiours compagnie vous face.

[415] Adieu mon fils.

Isaac

Adieu ma mere.

Sara.

Suyuez bien tousiours vostre pere,
Mon amy, & seruez bien Dieu,
Afin que bien tost en ce lieu
Puissiez en santé reuenir.